

ITANGAZO RISOZA INAMA ISANZWE Y'ABEPISIKOPI Y'ABEPISIKOPI YATERANIYE I
KIGALI KUVA KU WA 05 NZERI KUGEZA KU WA 08 NZERI 2017

Inama isanzwe y'abepiskopi gatolika mu Rwanda yareraniye i Kigali kuva tariki 5 kugeza tariki 8 Nzeri 2017, iyobowe na Musenyeri Filipino RUKAMBA, Umushumba wa Diyosezi ya Butare akaba na Perezida w'inama y'Abepiskopi gatolika mu Rwanda. Ku murongo w'ibyigwa hari ugusuzuma raporo z'imikoreshereze y'umutungo muri serivisi z'inama y'Abepiskopi n'iz'amaseminari ahuriweho na diyosezi zose mu mwaka wa 2016-2017, ndetse no kureba ingengo z'imari z'umwaka utaha wa 2017-2018. Abepiskopi kandi baboneyeho no gutegura ibaruwa bandikiye abakristu bose mu gusoza Yubile y'Imyaka ijana y'ubusaseridoti mu Rwanda, bakomeza baganira no ku zindi ngingo zitandukanye zirebana n'iyogezabutumwa.

Atangiza iyi nama, Musenyeri Filipino RUKAMBA yahaye ikaze Intumwa ya Papa mu Rwanda Andrzej Józwowicz wari witabiriye iyo nama ku nshuro ye ya mbere kandi aramushimira. Yakomeje ku by'ingenzi byaranze Kiliziya mu Rwanda mu minsi ishize birimo urugendo nyobokamana rw'abapadiri ku mva ya Baritazari GAFUKU i Mugombwa ku wa 23 Kamena 2017, ndetse n'itangwa ry'ubupadiri muri ku badiyakoni mirongo itandatu na batatu (63) ku itariki ya 22 Nyakanga 2017, ibyo byose bikaba byarabaye mu rwego rwo kwizihiza Yubile y'imyaka 100 y'ubusaseridoti mu Rwanda. Yakomeje kandi ashimangira ko abakristu gatolika bakomeje urugendo rubaganisha ku birori bya Yubile biteganyijwe ku wa 7 Ukwakira 2017 i Kabagayi.

Mu ijamba rye, Musenyeri Andrzej Józwowicz, intumwa ya Papa mu Rwanda wari witabiriye umuhango wo gufungura inama nk'uko tumaze kubivuga, yagaragaje ko yishimiye ubutumire. Yibukije amwe mu mabwiriza arebana n'imikoranye y'inzego za Kiliziya hagamijwe ubwuzuzanye. Yanagarutse ku ngingo zirebana n'iyogezabutumwa muri rusange ashimangira cyane cyane iry'urubyiruko n'umuryango rigomba kwitabwaho ku buryo bwihariye kuko ari ndasimburwa mu rwego rwo kubaka Kiliziya y'ejo hazaza. Ibyo bijyana no gukaza umurego mu kurera abaseminari ari bo bigezabutumwa b'ejo. Yibukije abepiskopi ko papa Fransisiko ashishikajwe cyane no kubona ko Kiliziya yaba uburuhukiro bw'abafite intimba, ikita ku mbabare no ku bafite ibibazo. Musenyeri Andrzej Józwowicz yasoje ijamba rye ashimira abepiskopi bo mu Rwanda ubutumwa Kiliziya gatolika irimo gusohoza mu Rwanda, kandi abifuriza kuzagira inama nziza.

Nyuma yo guhana amakuru mu madiyosezi yose, abepiskopi bakomeje batege amatwi raporo za serivisi zitandukanye z'inama y'abepiskopi: ubunyamabanga bukuru, urwego rushinzwe uburezi gatolika, urushinzwe imyigishirize ya gatigisimu, urukiko rwa Kiliziya, urushinzwe ibikorwa bya papa, komisiyo y'ubutabera n'amahoro, iry'urubyiruko, iry'umuryango, iry'abalayiki ndetse na Kinyamateka. icyagaragaye ni uko umwaka ushize wagenze neza kandi hakaba hari na gahunda ihamye irebana n'umwaka utaha. Nk'uko n'ubundi byifujwe mu nama zabanjirije iyi, Komisiyo y'abalayiki yasabwe gufasha komisiyo y'umuryango kwita ku bibazo birebana na wo. Komisiyo kandi zashishikarijwe gushaka uburyo bwo kwihaza, dore ko inkunga ziterwa rimwe na rimwe itaboneka cyangwa ikaza itinze, ibi bikadindiza imikorere yazo.

Nyuma y'aho, Abepiskopi bateze amatwi raporo za seminari nkuru ziahuriweho na diyosezi ndetse bemeza ingengo z'imari z'umwaka. Bishimiye ko ibikorwa byose byagenze neza kandi ko n'ingengo y'imari yateguwe neza. Abepiskopi basanze hagomba no gutekerezwa uko amazu ashaje ya za seminari yatangira kuvugururwa bihereye ku iseminari ya Rutongo. Hazabaho gusaba inkunga abagiraneza ariko

hazabaho n'igikorwa kizahurirwaho n'abasaseridoti bose kigamije gutera inkunga iyo seminari muri uyu mwaka w'Ubuseridoti.

Muri iyi nama, abepisikopi baboneyeho banoza gahunda yo kwizihiza yubile y'ubuseredoti mu Rwanda izabera i Kabgayi ku wa 7 Ukwakira 2017. Bagennye uko liturujya y'uwo munsu izaba iteye, ndetse n'ibirori bizayikurikira. Bifuje ko gahunda z'uwo munsu zaba ngufi kugirango bafashe abajya kure kugerayo kare. Abepisikopi kandi bateguye ubutumwa buzasomerwa abakristu muri iyi minsi dusoze yubile y'imyaka ijana y'ubuseredoti. Ubwo butumwa buzasomwa mu byumweru bibiri bibanziriza uwo munsu mukuru wo ku wa 7 Ukwakira, ni ukuvuga ku cyumweru tariki ya 24 Nzeri 2017 na tariki 1 Ukwakira 2017.

Abepiskopi banongeye gusuzumira hamwe ibijyanye no gushyira abasaseridoti mu mirimo inyuranye ihuriweho n'amadiyosezi yose cyane cyane muri za seminari nkuru. Barebeye hamwe ahaburagamo abantu babashyiramo babaha n'inshingano.

Abepiskopi banarebeye hamwe ikibazo cy'ubwishingizi bw'indwara ku bapadiri bumva uko byifashe mu biganiriro bagiranye n'abahagarariye amasosiyete atandukanye ari bo SAHAM na EMI. Bemeje ko bagiye gukomeza kubitekerazaho. Banasuzumye aho umushinga w'imikoranye na leta mu rwego rw'uburezi ugeze baha n'inshingano komisiyo ibishinzwe.

Abepiskopi bibukiraniye ingingo zirebana n'iyimurwa ry'Umunsu mukuru w'Abatagatifu bose bakurikije ibyo basabye kandi bemerewe n'ibiro bibishinzwe i Roma. Hemejwe ko kwizihiza uwo munsu mukuru w'Abatagatifu bose bizajya bikorwa ku itariki ya mbere Ugushyingo igihe iyo tariki yahuriranye no ku cyumweru; naho mu gihe itariki ya mbere Ugushyingo ibaye mu minsi y'imibyizi, uyu munsu mukuru uzajya wimurirwa ku cyumweru cya mbere cy'Ugushyingo. Umunsu wo kwibuka abakristu bitabye Imana wo ntuzajya uhinduka, uzajya wizihizwa ku itariki ya 2 Ugushyingo, keretse iyo tariki wagenewe ihuriranye n'icyumweru cya mbere cy'Ugushyingo. Muri icyo gihe, uzimurirwa ku wa mbere ukurikira icyo cyumweru. Ni ukuvuga rero ko uyu mwaka Umunsu mukuru w'Abatagatifu bose uzimurirwa ku cyumweru cya mbere cy'Ugushyingo, hazaba ari tariki ya 5/11/2017.

Bashoje inama bifuriza Musenyeri Tadeyo Ntihinyurwa Yubile nziza y'imyaka 75 y'amavuko azizihiza tariki ya 23 Nzeri i Kigali. Banemeje ko ku wa 28 Nzeri bazakora inama idasanzwe yo kwiga ku gitabo cy'amabwiriza rusange y'iyogezabutumwa "Tugendere hamwe" kirimo gutegurwa.

Inama yarangiye kuwa gatanu tariki ya 8 Nzeri 2017 i saa saba n'igice.

Padiri Hodari Jean de Dieu, Umunyambanga w'Inama y'Abepiskopi Gatolika mu Rwanda

+ Filipo RUKAMBA
Umwepiskopi wa Butare,
akaba na Perezida w'Inama y'Abepiskopi Gatolika mu Rwanda